

Candeilas da pasch

Il venderdis vargau ha la Scola Sedrun tarlichau l'entira notg en ina glisch tut speciala. Ei era quella da varga 100 candeilas ch'ils affons e giuvenils dalla vischnaunca da Tujetsch han decorau sco segn da pasch e solidaritad per l'Ucraina. L'uiara ei era vegnida tematisada ellas stanzas da scola durant l'instrucziun. La FMR ha vuliu saver dalla scolasta *Carla Flury-Nay* tgei che fatschenta ils affons e co l'instrucziun d'etica cun ina tematica aschi pesonta ei sesplegada. Cun raquintar ina historia dall'uiara ha era *Romana Deragisch*, la mussadra dalla scoletta Sedrun tematisau l'uiara culs pignets. Carla Flury-Nay e Romana Deragisch han buca constatau grondas temas tiels affons, l'uiara fatschenti denton tuttina els ed ei hagien giu enqual damonda. (fmr/sr) **Pagina 3**

Segn da pasch dalla Scola Sedrun

L'uiara dalla Russia encunter l'Ucraina fatschenta era affons e giuvenils. Perquei sto ella bunamein vegnir tematisada en scolas, aschia era ella Scola Sedrun. Sco segn da pasch han ei embelliu varga 100 candeilas cun maletgs e buns giavischs e quellas han glischau il venderdis l'entira notg sils parseuls dalla casa da scola.

SUSI ROTHMUND/FMR

Tematisar culs affons l'uiara dalla Russia encunter l'Ucraina ei actualmein strusch d'evitar. Ferton ch'entgins affons han gia discurren en famiglia da quella, san auters mo pauc. Quels che possedan in telefonin s'informeschan magari era sezs e consumeschan forsa dabia fake news. Per la magistraglia ei quei ina tematica d'ètg pretensiusa, quei ha era *Carla Flury-Nay* constatau. Ella instruescha etica ella tschunavla e sisavla classa a Sedrun.

Negina tema

Avon che tractar l'uiara durant l'instrucziun d'etica, ha Carla Flury-Nay vuliu saver da sias scolaras e ses scolar, sch'igl interess ei insumma avon maun. «Els ein stai fetg interessai aschia che nus havein discurren durant la davosa lecziun d'etica dall'uiara. Nus havessen aunc saviu cuntinuar ditg», ha la scolasta declarau ed aschuntau ch'ella tematiseschi forsa aunc in'ulteriura ga l'uiara. Ella havevi buca semtgau in program, mobein semplamein dau spazi als affons da tschentar damondas e raquintar tgei che fatschenta els. Las davosas jamnas haveva Flury-Nay tematisau ils dretgs dils affons durant l'instrucziun d'etica ed aschia seigi ei iu bein da far naven da quels ina punt vi sin l'uiara. Aschia hagien ei realisau ch'ils affons en l'Ucraina han d'in mument sin l'auter giu negins dretgs pli.

Alloschi en scola

Entgins hagien manegiau ch'ei mondi bein culs affons ell'Ucraina, damai ch'ei stoppien ussa buca pli ir a scola. «Ei han denton spert realisau che l'uiara ei tut auter che cool. Biars savevan pauc ni nuot dall'uiara ed auters fetg bia», di la scolasta che ha buca giu il sentiment che l'uiara fetschi tema a sias scolaras ed a ses scolar. Per sepreparar aschi bein sco pusseivel ha Carla Flury-Nay impundiu dabia temps per capir la historia ed ils motivs che han menau

all'uiara. «Tut lur damondas hai jeu tuttina buca vuliu ni saviu risponder, mo quei san aunc biars auters era buca far», conceda ella.

Ils fugitivs fatschentien ils affons ed ei hagian dumandau sch'ils Tuatschins savessien buca metter a disposiziun a tals la scola veglia a Rueras. «Jeu hai declarau ch'ei dat gia entginas pusseivladads e centers per fugitivs en nossa regiun e che la scola fussi forse in'opziun sche quellas localitads fussien tuttas occupadas», aschia Carla Flury-Nay. Smarvegliau ha la scolasta era dalla remarca d'ina buoba che ha manegiau, che bia Russ lessien era buca quell'uiara.

Fake news

«Quei ei forse in aspect che va empau a piarder ellas medias, persunter consumeschan ei magari fake news ed igl ei gia grev per carschi da saver far la differenza denter novitads veras e desinformaziuns», di ella. Ils affons havevien per exempel udiu che *Putin* e sia famiglia seigien el Tessin e vuliu saver sche quei seigi ver. Ils affons levien saver, tgei influenza ch'ei havessi per la Svizra, sch'ina bumba atomara tucassi l'Ucraina. «Jeu hai buca vuliu entrar memia fetg sin quei e hai perquei declarau, ch'il vest astgi buca semischedar en memia fetg. Autruisa smanatschi la Russia cun armas atomaras. Mo l'Ucraina seigi tuttina ver 1500 km naven da nus.» Enzacons da ses scolars savevien gia dabia da bumbas atomaras e d'autras armas. «En general hai jeu sespruau da buca far tema als affons ed enqualga haiel era cussegliu da tematisar quei ni tschei a casa culs geniturs», di Carla Flury-Nay.

Far enzatgei

Era la mussadra *Romana Deragisch* ha tematisau l'uiara cun ses pignets. Ella ha fatg quei cun raquintar ad els la historia da Warenka. «Quei ei in cudisch che tematisescha l'uiara en Russia. Ei va per ina dunna che less buca bandunar sia tiara ed ei restada. En sia casa ha ella dau alloschi a fugitivs. Mintga sera fagevan ei buns patratgs per ch'ei vegnien schurmegiai e la schuldada anfli buca els. La fin finala ei la casa bunamein nevida en diltut e l'armada ei ida sperasvi senza prender notizia dalla casa pleina cun fugitivs», resumescha la mussadra la historia ch'ella ha elegiu per avischinar empauet la tematica dall'uiara e mussar che buns patratgs gidan. Aschia ha Romana Deragisch era giu l'idea d'embellir candeilas e quella ha plaschiu aschi bein che gest l'entira Scola Sedrun ha fatg quei.

Tema difficil

Tenor la mussadra eis ei dètg heicli da tematisar aschia enzatgei pesont culs pignets. Perquei hagi ella mussau silla carta nua che la Russia ei e con pintga che l'Ucraina ei encunter quella. Ses scolarets hagian buca giu massa damondas, denton tuttina vuliu saver sch'ils Russ vegnien era en Svizra. «Jeu hai buc vuliu far tema ad els e detg na, na. Ei han tedlau cun atenziun cu jeu hai raquintau dil post da militar sil Scopì e che nus hagian ina bun'armada che protegia nus e nossa tiara. Ils pignets han giu plascher da far maletgs per ornar las candeilas e quei han ei fatg cun gronda breigia e carezia», aschia Romana Deragisch. Las candeilas culs messadis han illuminau la scola il venderdis notg ed aschia han scolaras e scolars tarmess lur giavischs per la pasch ora el mund. Ei han plinavon era saviu tarmetter ina biala summa daners alla cadeina da fortuna. L'jamna vargada ha la Scola Sedrun numnadamein giu dis dallas portas aviartas cun uustria e buffet da pettas. Il recav ei ius a favur dall'Ucraina.

